

**BOSNA I HERCEGOVINA  
FEDERACIJA BOSNE I HERCEGOVINE  
HERCEGOVAČKO NERETVANSKI KANTON  
OPĆINSKI SUD U MOSTARU**

**Broj: 058-0-Su-1201/26**

**Mostar, 21.05.2026. godine**

Predsjednik suda Bajro Avdić na osnovu člana 31. stav (l) Zakona o sudovima u Federaciji Bosne i Hercegovine („Službene novine Federacije BiH” broj: 38/05, 22/06, 63/10, 72/10, 07/13 i 52/14), u vezi sa članom 57. Zakona o zaštiti ličnih podataka („Službeni glasnik BiH”, broj: 12/25), te Uputstava Visokog sudskog i tužilačkog vijeća Bosne i Hercegovine za upotrebu sistema video nadzora na zgradama pravosudnih institucija u Bosni i Hercegovini (broj: 09-02-3-989-1/20 od 10.03.2020.god) donosi sljedeću:

**ODLUKU  
o video nadzoru u Općinskom sudu u Mostaru**

**Član 1.**

Ovom Odlukom uspostavlja se sistem video nadzora u Općinskom sudu u Mostaru, definiše njegova svrha i opravdanost, te određuju pravila prikupljanja, obrade, načina korištenja i davanja prikupljenih podataka, kao i način i rokovi čuvanja podataka.

Sistem video nadzora vlasništvo je Općinskog suda u Mostaru.

**Član 2.**

Nosilac podataka, u smislu ove Odluke, je fizičko lice čiji se identitet može utvrditi neposredno ili posredno na osnovu fizičkog izgleda tog lica.

**Član 3.**

Video nadzor u Općinskom sudu u Mostaru podrazumijeva snimanje i pohranjivanje vizualnih zapisa.

Podaci koji se obrađuju sistemom video nadzora predstavljaju lične podatke u skladu sa Zakonom o zaštiti ličnih podataka („Službeni glasnik BiH“ , 12/2025) i sadrže: sliku, pokret, vrijeme i datum video zapisa.

**Član 4.**

Video nadzor se provodi u svrhu:

1. pružanja sigurnosti i zaštite radi kontrole pristupa, što posebno podrazumijeva sigurnost i zaštitu imovine, osoba iz člana 2. ove Odluke, te sigurnosti i zaštite dokaznih materijala, dokumenata i sl.
2. sprečavanja, onemogućavanja i prema potrebi istraživanja sigurnosnih incidenata, mogućih opasnosti ili neovlaštenih fizičkih ulazaka, uključujući neovlaštene pristupe

osiguranim prostorima i prostorima pod zaštitom, IT infrastrukturi ili operativnim informacijama, te upravljanju njima

3. sprečavanja, otkrivanja i istraživanja slučajeva krađe opreme ili imovine u vlasništvu Općinskog suda u Mostaru ili Sudske policije, zaposlenika ili posjetilaca, kao i sprečavanju, otkrivanju i istraživanju prijetnji sigurnosti u zgradi suda
4. odvratanju od činjenja navedenih i svih drugih inkriminiranih radnji u i oko prostorija Općinskog suda u Mostaru i Sudske policije.

#### **Član 5.**

Sistem video nadzora može se upotrebljavati samo u skladu sa svrhom propisanom ovom Odlukom.

Sistem video nadzora nije dozvoljeno koristiti radi kontrole zaposlenika, osim kada se radi o zaposlenicima koji su neposredno angažirani na poslovima vezanim za sigurnost, zaštitu i kontrolu pristupa i kada je radno mjesto zaposlenika na javnom mjestu, odnosno mjestu koje je označeno kao mjesto koje je pod video nadzorom.

Podaci prikupljeni sistemom video nadzora ne smiju se koristiti suprotno Zakonu o zaštiti ličnih podataka.

#### **Član 6.**

Kamere koje se ugrađuju u sistem video nadzora trebaju imati adekvatnu rezoluciju, a prilikom njihove ugradnje u vidnom polju ne smiju se nalaziti bilo kakve prepreke zbog čijeg prisustva se onemogućava pravilno funkcionisanje video nadzornog sistema.

Lokacije kamera i uglovi snimanja temelje se na sigurnosnoj procjeni koju izrađuje nadležna organizaciona jedinica Sudske policije i postavljaju se na najvažnijim lokacijama u zgradi i izvan nje.

#### **Član 7.**

Općinski sud u Mostaru dužan je postaviti obavještenje o video nadzoru na način da se na objektu postavi jasno vidljiv natpis: „OBJEKAT JE ZAŠTIĆEN VIDEONADZORNIM SISTEMOM“.

#### **Član 8.**

Nadzor nad monitorima i uređajima za snimanje nalazi se kod nadležne organizacione jedinice Sudske policije.

U skladu sa stavom 1. ovog člana Sudska policija treba posjedovati šifre za pristup sistemu kako bi mogla pravovremeno vršiti eventualno potrebne sigurnosno-preventivne preglede u stvarnom vremenu, kao i preglede snimljenog materijala u proteklom periodu.

Pitanja šifre, čuvanja šifre, odgovorne osobe za isto i sl. uređuje se posebnim aktom nadležne organizacione jedinice Sudske policije.

